

一貫道原典系列

三三歸一 ④

不虛先生講  
歸一子整理

(續上期)

源曰：修身乃儒者之事，何得謂為佛教？

答曰：儒者之所謂修身，不過端好惡，慎舉動，修後天有生有死之假身而已。若聖經所謂修身，固修先天之真也。試思明德、新民、止至善，明德何物也？新民何事也？至善何地也？知止一節，實煉己持心，了性了命，修身成真之口訣也。蓋人之真身，先天居於乾宮，一性圓明，渾然天理，無思無為，清淨自在。至後天乾變為

離，坤變為坎，先天真身，失陷坎宮，故必取離火下照，以盡坎宮陰氣，將先天真身，取歸乾宮，用三昧真火，鍊成金剛之身，萬劫不壞，此佛教所謂修身，即聖經所謂修身也。夫修真身者，假體亦不可不修，然而借假修真，當知身外有身，不可誤認假身為真身也。

源曰：聖經所云，固足以證中國為佛國之語，然亦偶合耳，他處尚有可以為證者乎？

答曰：中庸言使天下之人，齋明盛服，以承祭祀，夫天下之人，皆持齋茹素，明心見性，非佛國而何。

源曰：齋者所以齋潔其心，非茹素之謂也。

答曰：鄉黨章言齋必變食，周禮言齋日不舉，明言齋者，不飲酒食肉也，何得謂齋止齋其心乎。但齋口亦必齋心，故古人以齋字為齋字，所以明齋必心與口齋，內外如一也，後聖恐人只知齋口，不知齋心，故於齋字內添一心字，乃示人以齋必潔其心，不徒潔其口也。而後儒遂謂齋只齋傑其心，非茹素以潔其口也，抑亦以訛傳訛之誤耳，否則力闢佛教，故諱言持齋為茹素也。

源曰：天下之人，齋明盛服，固謂承祭時然也，倘非承祭，未必齋也。

答曰：孔子告哀公曰：「齋明盛服，非禮不動，所以修身也。」修身以齋為首務，既曰自天

子以至於庶人，皆以修身為本，則天下無一人不修身，即無一人不齋明也，不但此也，至誠盡己性，盡人性，以盡物性，而贊化育，所謂盡性贊化育者，必咸若其性，而後可謂之盡性。必各正性命，保合太和，而後可謂之贊化育也。向使恣殺物命，傷天地生物之仁，何以能盡物性，又何以能贊化育乎？又云萬物並育而不相害，若持齋戒殺，何以能並育而不相害乎？又謂至聖之聲名，洋溢中國，施及蠻貊，以至凡有血氣者，莫不尊親，夫僅曰人莫不尊親，亦難，試思從古稱盛治者，莫過於堯舜，然而共謹朋比為奸，三苗負固不服，未聞莫不尊親，故博施濟眾，堯舜猶病也。今則尊親者，凡有血氣者皆然，血氣豈徒人有乎？胎卵溼化之物，誰非有血氣者，乃莫不尊親，必其博施愛物之仁，有以深入乎含生賦性之眾也，必其戒殺放生之德，有以遍洽乎蠢動含靈之繁也。非然者，於有血氣者殺而食之，彼方且讎我實甚，而豈能致彼之尊親，而莫不皆然乎。歷歷所載，皆預洩中國化為佛國之天機也，然苟不固聰明聖知達天德者，其孰能知之。

源乃悲喜交集，長跪涕泣而謝曰：「源今得聞此論，真萬劫奇緣也，不然，固執成見，自以為是，將墮入劫中，不免萬劫沉淪矣！」

是時復有一弟子，名曰道成，進而問曰：適聞先生之論，如夢初覺，真萬幸也，但所言三期之普度，既開於儒教，孔子為儒教之宗，則所傳道統，宜自孔子而來，何以今之相承者，乃為釋教之祖派乎？

答曰：釋教掌二期之道，儒教掌三期之道，孔子之時去三期猶遠，道還掌自釋教，故聖道僅傳顏曾思孟而止，而四子之書，不過留之末後以作憑證。至梁時，三期將近，達摩乃以西來之大意，續東魯之道統，一花五葉，白馬二祖，始接釋氏之傳，而道於是掌之儒教矣。故今之所承者，雖佛祖之派，而所傳者，猶是一貫之道也，道傳一貫，派承佛祖，此普度所以開自儒教，而得道者又終成佛也。

成曰：儒教承祖派，既聞命矣，敢問儒童掌普度之教，此何據乎？

答曰：儒道之統，肇自伏羲，伏羲生於巳會之末，蓋二期之劫既過，天又為三期之普度，故特命天一之水精，化身為伏羲，又使龍馬負圖，以洩造化之祕，伏羲因畫八卦，而道之大原以開，然祇有先天，尚無後天，故商末，伏羲又轉化為文王，復演後天八卦，而道之體用，於是乎大備。但道雖有體有用，而人止知先天變後天，

不知後天返先天，周公雖作文詞，而其理猶未昭明，故周末，水精又倒裝為孔子，贊成十翼，而一陰一陽之謂道，陰陽不測之謂神，乃明示人以超凡入聖之妙矣。奈何百姓日用而不知，以窮理盡性至命之學，而專指為卜筮之書，大失水老之真傳，所以三期普度，水老必親臨，而心法始出也。況儒教以孔子為宗，孔子即水老，水老即儒童，今儒教開普度，天不命儒童掌道，而命誰也。

成曰：彌勒當收圓之教，又何據乎？

答曰：考元始正宗篇，及月華老人長歌，皆言原人初生之時，朝往暮歸，不肯久居濁世，道母乃與三天諸佛共議，命彌勒引眾沐浴河水，暗摘性光之半，藏於乾坤袋中，眾遂流而忘返，苦海沉淪，今欲收圓，若不命彌勒掌教，乾坤之布袋誰開，男女之性光誰復，普度縱開，而原人終不能返本還原，此收圓之道，所以必掌之彌勒也。

成曰：普度必彌勒始成收圓，則三期之初，彌勒當早下世，何以至末後始來乎？

答曰：普度之開，非數十年不為功，收圓之主，何可生於普度之初，故中庸云：「待其人而後行。」凡在修門者皆曰等箇人來，蓋普度之

人，原為彌勒開荒打草，而彌勒必收圓始至也。成曰：普度收圓之道，必賴人傳，自謂神傳者即魔也，敢問掌教者亦必祖祖相傳乎？

答曰：祖祖相傳，此是常理，但道脈有斷續，道還有污隆，道脈之續者，前後相繼，但須以人傳人，表奏三天，而天命即屬於斯人矣。若道脈既斷者，人與人不能親傳，則必借天神以傳之，如九祖之盤，繼夫八祖，而心法實得之異人，異人者何？天神也。蓋九祖與八祖相去千有餘年，道母已收衣鉢，故九祖之盤，天必化異人以授之，而後可續八祖也。又如何祖之道，傳自吳祖，而（自家水）火乃得之奇童，奇童者何？天神也。蓋九祖十祖相承，惟玄關一竅，而萬劫不壞之身，必得「自家水自家火」始成，故何祖之全功，天必化奇童以授之，而後可開普度也。此道脈有斷續之分，授受所以有天人之別也。道運之隆者，謹遵祖規，亦祇以人傳人，表奏三天，而天命即注於是人矣。若道隆偶污，違逆天命，變亂祖法，度人而適以害人，天必別擇有德者，以與之，使之易邪為正，轉敗為成也，故徐楊之盤，水祖未嘗親受，而水祖掌普度之道，天自有以命之也，此道運有污隆之異，天命所以有轉移之殊也。（續下期）